

Komisaun C finaliza ona relatóriu no paresér proposta OJE 2020



Prezidente Komisan C, Deputada Maria Angelica Rangel.
Imajen/Antonio Goncalves

DILI, 01 outubru 2020 (TATOLI)—Komisaun C (Finansa Públika) liderada Deputada Maria Angélica Rangel, finaliza ona relatóriu no pareser proposta Orsamentu Jerál Estadu (OJE) 2020 no orsida tuku 14.00 sei apresenta ba plenária hodi halo debate iha faze jeneralidade.

Komsaun Finansa Públika prova relatóriu no pareser ne'e ho rezultadu votasaun a-favór 10, kontra 0 no abstensaun 3.

Prezidente Komusaun C, Maria Angélica Rangel, fó-sai katak loloos ne'e ohin tuku 11.00 dadeersan debate ona maibé tanba Komisaun C seidauk finaliza relatóriu no paresér entaun adia ba tuku 14.00 lokraik.

“Ami foin halo aprovasaun relatóriu no paresér iha komisaun C nian, inklui mós komisaun espesializada hotu-hotu. Ami konklui ona no sei lori ba plenária iha tuku 14.00 lorokrak,” Deputada Maria Angélica Rangel, informa ba jornalista sira iha resintu Parlamentu Nasionál, kinta ne'e.

Prezidente Komisaun C ne'e hateten, rekomendasaun ne'ebé komisaun sei levanta iha plenária mak estrutura orsamentu ne'ebé la koloka iha fatin loloos.

Prezidente Komisaun C ne'e fó ezemplu, orsamentu ba rekuperasaun ekonómika ne'e loloos ne'e deskreve iha fundu COVID-19 la'ós tau fali iha Ministériu Estadu Koordenadór Asuntu Ekonomia (MEKAE).

“Dívia ser tau iha fundu COVID-19 nian la'ós tau iha Ministériu Estadu Koordenadór Asuntu Ekonomia (MEKAE),” nia dehan.

Lider Komisaun C ne'e mós rekomenda ba Governu solusiona dívida naun-financeira ne'ebé Governu anteriór sira halo.

Nia mós nota dokumentasaun orsamentál 2020 nian iha errata maibé sei fó-sai liuhosi relatóriu no paresér liuhosi plenária.

“Loos! Livru orsamentu ne'e errata barak depois ita-boot sira sei akompaña iha ami-nia relatóriu,” Prezidente Komisaun C ne'e hateten.

Ihauku 14.00 lorokraik ba loron ohin nian, Governu sei hatán despeza ho montante orsamentu biliaun \$1.497,1 prevee ba saláriu no vensimentu millaun \$206,7, bens (sasán) no servisu millaun \$499,3, transferénsia públika millaun \$568,7, kapitál minór millaun \$8,9 no kapitál deenvolvimentu millaun \$213,4.

Montante orsamentu biliaun \$1.497,1 ne'e, Governu ezekuta ona balun hahú hosi janeiru to'o setembru 2020 liuhosi Dotasaun Temporáriu Orsamentál (DOT).

Jornalista: Evaristo Soares Martins

Editór: Cancio Ximenes

Timor-Leste tenke sai hosi rejime duodesimál



Prezidente Komisaun C (Finansa Públika), Deputada Maria Angélica Rangel.
Imajen/Egas Cristovao.

DILI, 01 outubru 2020 (TATOLI)—Prezidente Komisaun C (Finansa Públika) iha Parlamentu Nasionál, Deputada Maria Angélica Rangel hateten, Timor-Leste tenke sai hosi rejime duodesimál no tenke sai hosi impase polítiku.

Molok hato'o relatóriu no pareser, Prezidente Komisaun C (Finansa Públika), Deputada Maria Angélica Rangel, hateten kuaze tinan rua Timor-Leste moris ho rejime duodesimál tanba kauza hosi aktu no desizaun sira-ne'ebé timoroan hotu tenke responsabiliza tantu pasivu no ativu.

Maibé nia dehan, ohin, iha fukun ida-ne'e hatudu matenek no sensibilizasaun ba povu nia moris hodi halo apresiasaun ba Orsamentu Jerál Estadu (OJE) 2020.

“Ho hano in ida katak Timor-Leste tenke la'o nafatin bá-oin iha aspeitu vida tomak. Tan ne'e rekere ita hotu nia seriedade, ita-nia análise ne'ebé kle'an. Ikus liu atu desizaun ne'ebé nakonu ho esperansa no espetativa atu hateten lae ba duodésimu nune'e ajuda rekupera fali esperansa no lalais povu RDTL sai hosi impase polítiku ida-ne'e,” Prezidente Komisaun C informa liuhosi plenária, Parlamentu Nasionál, kinta ne'e.

Iha debate faze jeneralidade ba proposta OJE 2020 ne'e parte Governu nian lidera direktamente hosi Primeiru-Ministru, Taur Matan Ruak, Vise-Primeiru-Ministru na'in-rua no membru Governu tomak.

Nune'e mós hosi parte Parlamentu Nasionál nian prezide plenária lidera hosi Prezidente Parlamentu Nasionál, Deputadu Aniceto Longuinhos Guterres Lopes no membru parlamentu sira hotu.

Debate iha faze jeneralidade loron dahuluk ne'e ba despeza ho montante orsamentu biliaun \$1.497,1 prevee ba saláriu no vensimentu millaun \$206,7, bens (sasán) no servisu millaun \$499,3, transferénsia pública millaun \$568,7, kapitál minór millaun \$8,9 no kapitál deenvolvimentu millaun \$213,4.

Montante orsamentu biliaun \$1.497,1 ne'e, Governu ezejuta ona balun hahú hosi janeiru to'o setembru 2020 liuhosi Dotasaun Temporáriu Orsamentál (DOT).

Aprezentasaun proposta OJE 2020 datoluk, Xefe Governu husu PN konsidera



Governu apresenta Proposta OJE 2020 ba datoluk iha faze jeneralidade ba loron dahuluk, iha sala plenáriu Parlamentu Nasionál, kinta (01/10). Imajen Tatoli/Egas Cristovão

DILI, 01 outubru 2020 (TATOLI)—VIII Governu Konstitusionál hahú apresenta proposta Orsamentu Jerál Estadu (OJE) 2020 ba datoluk iha faze jeneralidade ho karatér urjénsia, ne'ebé antes ne'e ezekutivu sira fixa ho montante biliaun \$1,497.

Montante ne'e fahe ba kategoria saláriu no vensimentu millaun \$206,8, bens no servisu milliaun \$496,7, transferénsia públika millaun \$571,1, kapitál menór millaun \$8,9, kapitál dezentvolvimentu millaun \$213,4.

Iha biban ne'e, Primeiru-Ministru (PM), Taur Matan Ruak, husu membru Parlamentu Nasionál (PN) atu konsidera proposta ne'e .

“Ba datoluk Governu apresenta no husu aprovasaun ba Proposta Orsamentu Jerál Estadu ba tinan fiskál 2020. Aprezentasaun ne'e iha sirkunstánsia ne'ebé exesionál tebes, bainhira pasa fulan-sanulu ho ezekusaun orsamentál iha rejime duodésimu durante períodu ne'ebé ita hasoru teste ida, nu'udar povu no nasaun soberana ne'ebé unida no independente,” intervensaun Xefe Governu iha loron dahuluk debate faze jeneralidade iha sala plenáriu plenariu, kinta ne'e.

Xefe ezekutivu konsidera timor-oan sira hatudu ona kapasidade ba mundu atu reziste hasoru krize no adversidade, hodi reaje ba dezafiu no obstákulu inklui ba difikuldade no mudansa sira ho aten barani, firmeza, konjugasaun entendimentu no mobilizasaun husi vontade no esforsu.

“Hafoin rejeisaun proposta orsamentu daruak, mosu kedas períodu inserteza no impase polítiku iha nível nasionál. Nu'udar nasaun sente orgullu tanba ita-nia diferença política oinoin bele rezolve ho dame maibé naturalmente hosi natureza

polítika ne'e rasik mak ita iha hanoin la hanesan. Mosu diskusaun ho respeito no partilla mehi ne'ebé boot tebes atu transforma Timor-Leste sai país justu, modernu, ekuitativu, prósperu no dezvoltadu liután ho rendimentu médiu-as," nia akresenta.

Nia nota katak durante ne'e Timor-Leste hatudu hanesan país ne'ebé haree liubá sidadaun ne'ebé hatuur ema-nia dignidade iha sentru dezvoltamentu, fó kondisaun moris di'ak sosiál no ekonómiku, asesu ba saúde, edukasaun, abitasaun, eletrisidade, bee no saneamentu báziku, ne'ebé nesésáriu.

"Kondisaun no biban hirak ne'ebé ita hotu rekoñese hanesan buat ne'ebé nesésáriu no esensiál atu kumpre promessa oin-oin ne'ebé Governu repete ona durante tinan sanulu-resin-ualu nia laran atu halakon hamlaha, hamenus moris-kiak, kria empregu dignu no husik hela hanesan liman-rohan ba jersaun foun sira, país prósperu, pasífiku, tolerante, inkluzivu, sensível ba kestaun jéneru no maske preokupa ho ninia sidadaun sira-nia moris haksolok, la haluha no la husik hela ita-nia maluk ida ba kotuk," nia subliña.

Iha lora 15 outubru 2019, Governu submete Proposta Lei OJE 2020 daruak ba PN, ne'ebé ho montante biliaun \$1,950 (inklui impréstimu \$73), bainhira esklui impréstimu hamutuk biliaun \$1,887, no bainhira fahe tuir kategoria saláriu no vensimentu millaun \$241,271, bens no servisu millaun \$738,428, transferénsia pública millaun \$457,773, kapitál menór millaun \$53,267 no kapitál dezvoltamentu millaun \$459,260.

Maski nune'e, iha lora 3 dezembru 2019, Primeiru-Ministru, Taur Matan Ruak, retira Proposta OJE 2020 husi PN tanba rona opiniaun no preokupasaun husi deputadu sira ne'ebé konsidera montante boot liu no kontra Lei Jestaun Finanseira.

Nune'e, Governu lori hikas proposta ba daruak hodi diskute maibé iha 17 janeiru 2020, Proposta OJE 2020 la pasa iha diskusaun jeneralidade ho rezultadu votasaun a-favór 13, kontra 15 no abstenasaun 25.

Proposta foun OJE 2020 ne'ebé la pasa ho montante biliaun \$1,668, kompostu hosi saláriu no vensimentu millaun \$235,6, bens no servisu millaun \$561,8, transferénsia pública millaun \$329,706, kapitál menór millaun \$31,548 no kapitál dezvoltamentu millaun \$488,83.

Tuir ajenda ne'ebé aprova ona iha reuniaun líder bankada, diskusaun jeneralidade no especialidade ho karatér urjénsia ne'e sei realiza durante lora hitu, hahú ohin.

Jornalista: Antónia Gusmão

Editora: Julia Chatarina

PM Taur: “tinan 2020 koñesidu hanesan rezisténsia no reziliénsia



Governu apresenta Proposta OJE 2020 ba datoluk iha faze jeneralidade ba loron dahuluk, iha sala plenáriu Parlamentu Nasionál, kinta (01/10). Imajen Tatoli/Egas Cristovão

DILI, 01 outubru 2020 (TATOLI)—Iha apresentasaun Proposta Lei Orsamentu Jerál Estadu (OJE) 2020 ba datoluk iha faze jeneralidade, Primeiru-Ministru (PM), Taur Matan Ruak, nota katak fulan-sanulu ikus Governu hasoru krize tolu.

“Fulan-sanulu ikus ita koñese hanesan tinan ho impase polítika, dezastre naturál no krize COVID-19, maibé ha’u fiar ho orsamentu no medida ne’ebé hala’o, ita sei ramata tinan ne’e ho fiar metin sai koñesidu hanesan tinan rezisténsia no reziliénsia povu Timor-Leste ninian,” relata Xefe Governu iha loron dahuluk debate faze jeneralidade iha sala plenáriu, Parlamentu Nasionál (PN), kinta ne’e.

Xefe ezeutivu ne’e dehan, tinan rezisténsia hahú kedas hafoin surtu dahuluk ho programa estabilizasaun ekonómika no sosiál ne’ebé ambisiozu ho pakote estímulo ekonómiku ida, kompostu hosi medida konkreta iha kurtu no longu prazu atu hamenus efeitu krize ne’ebé mosu iha nasaun ne’e.

“Medida sira sei fó tulun ema sira no uma-kain timor-oan hamutuk 298.000-resin ho subsidiu diretu, hodi injeta fonte rendimentu ne’ebé krusiál atu hamenus hamlaha no moris-kiak, iha momentu ne’ebé akontese suspensaun atividade ekonómika hodi halakon rendimentu no dezempregu sira sa’e,” nia informa.

Tuir PM, medida ne’ebé dezeña ona justifika kriasaun fundu COVID-19 ida atubele hatán ba problema no nesesidade operasionál inklui lojístika, ne’ebé obriga atu kria sistema ba vijilánsia, detesaun no referénsia ba kazu suspeitu virus, ba sentru kuarentena, izolamentu no rekuperasaun paciente nian sira.

“Ita koloka iha medida hirak ne’e poupanza hamutuk besik porsentu 14, ne’ebé hetan hosi restrisaun hirak ne’ebé impoin iha ezeusaun iha rejime dotasaun orsamentál sira durante fulan-sanulu, tanba medida sira representa aumentu signifika-tivu hosi rekursu sira ne’ebé disponível ba konkretizasaun moris di’ak sosiál no ekonómiku ema sira,” Xefe Governu akresenta.

Tinan reziliénsia ne'ebé fini sei kontinua kari iha fulan sira tuirmai, ne'ebé ninia efeitu sei dada to'otinan tuirmai, ho inísiu hosi implementasaun medida ne'ebé propoin husi Planu Rekuperasaun Ekonómika ne'ebé apresenta ona iha fulan-agostu husi Komisaun ida kompostu husi pérиту no espesialista timor-oan sira.

Tuir PM, medida sira fó oportunidade atu hatán la'ós de'it ba problema ne'ebé mosu tanba pandemia COVID-19, maibé bele hahú dalan loos ne'ebé bele hatán iha prazu médiu no prazu naruk ba problema estruturál ne'ebé sei limita dezvoltamentu nasaun ne'e nian.

“Ha'u fiar hanesan orsamentu rezisténsia no reziliénsia nian ne'ebé maka programa, medida no resposta ne'ebé apresenta hatudu momoos ezekusaun orsamentál iha fulan-sanulu nia laran, ne'ebé kontribui ativamente atu hamenus impaktu negativu sira ne'ebé maihosi impase polítiku, dezastre naturál sira no krize COVID-19 atubele hatán ba nesesidade urjente no estabiliza sosiedade no ekonomia iha momentu resesaun no kontrasaun ekonomia ida ne'ebé akontese iha nasaun hotu iha mundu,” nia subliña.

Jornalista: Antónia Gusmão

Editora: Julia Chatarina